

四庫全書

集部

欽定四庫全書

華陽集卷三十七

宋 王珪 撰

制詞

制

程戡授武安軍節度加食邑實封判延州制

門下周禮命卿司馬掌國征之事漢儀遣帥將軍額閭
制之權自非謀經帷幄之咨名厭疆陲之難則何以稽
圖而受社賜律以臨戎茲疇舊政之良式協師虞之望
具官某體忠忱之度蹈夷雅之風進蹇藝文之華仕階

名秩之撫方先朝之籲俊更三府之告猷左右六年夙
夜一節肆纂休於皇緒適留寄於邊衝空深寤寐之思
且重安危之倚上金城之方略猶知克國之強習闕里
之絃歌還見祭遵之佚就付兩河之節薦綏西土之封
既衍食於爰田復倍輸於真戶風聲雖舊寵數維新於
戲制夷狄者備不可遽忘守方隅者勢不可數易蓋威
素申則敵情摯信久著則士心懷尚堅壯圖往服渥命
可

曹侑授保平軍節度加食邑實封制

門下朕承景歷之昌嗣丕構之重渙敷大命胥澤羣元
咨我方岳之良時維屏翰之憲念宣勞於劇委稽渙獎
於陟文卜以剛辰告於列序具官某體冲韻邃氣勁謀
沈傳圯上之神書託西京之肺腑允顯祖烈實為宗臣
於皇母儀克后先帝濟忠純於奕世履謙勅而保躬
共武之威迺踐元戎之貴助守文之德式繫外戚之賢
進導徽猷參聯台路肆續膺於聖統方倚輔於英藩載

疏冢社之榮增視上公之峻隆階表貴衍食敦封萃為
寵休以睦嫺近於戲詔爵祿之柄天官以馭夫羣臣錫
車馬之儀大雅以褒夫元舅蓋績美則報之厚愛隆則
禮亦蕃往懋淑聲永綏多福可

富弼授依前檢校太師同中書門下平章事鎮
海軍節度使判河陽加食邑實封功臣制

門下入筦天樞以導萬微之命出藩王室以倡九牧之
風維時左右之良固無內外之間宜頒渙命式告治廷

具官某執心端夷涵德粹茂有幾聖之學窮天人精祲
之原有經世之材洞國家表裏之體方先帝之在御擢
又於冢司肆冲人之守圖召謀於宥府百姓有衣食之
遂四方無兵革之虞迺去冬以來屬病在告雖懷憂國
之慮每上退身之言眷舊德之弗忘終高情之靡已聽
解神機之劇越升揆路之崇建海岱之高牙填河橋之
臣屏加以爰田之戶衍以真食之封併舉徽章式優賢
輔於戲進而合諸道得君子光亨之時退以遂其私保

大雅明哲之福往綏冲履還翼丕成可

皇長女封德寧公主制

門下朕荷九旻之顧奉四聖之圖恭陟厥后之尊大纂
有邦之慶蓋化行庠中者治之本恩發於近者愛之隆
既展睦於皇宗矧鍾慈於天性稽我成憲豈云私親皇
長女秉幽靖之儀賦柔明之德神祚衍於遐派天資茂
於芳年有勤澣服之工嘗鑑繪圖之戒肆鴻休之丕冒
宜徽稱之肅承方主以同姓之賢復視以真王之秩可

欽非寵可慎非猷於戲美王姬之華昔起召南之詠建
帝女之號近遵唐室之彝勉流淑聲永保隆福可

張昇授依前檢校太尉同中書門下平章事彰
信軍節度使判許州加食邑實封功臣制

門下夫達進退之分則臣節高篤始終之恩則君道大
粵予耆艾之德久財幾密之司寵至而色愈兢年踰而
志彌幼匪推殊獎曷表羣倫具官某敦簡廉之風賦莊
厚之體早陞華於政路遂長議於樞廷從容樽俎之間

薦收於奇策密勿廟堂之上預定於大謀自先帝之升遐方冲人之在疚顧家多難有若涉川之危繫國大臣遂成奠枕之泰卿屢擢於疾苦比願解於機煩朕雖眷春秋之高不忘忠誼之至俞音未卜素尚益堅宜膺鉞之榮用寄藩符之秩倍始荒之奉邑衍新食之真封舉示褒章式旌美績於戲安世且老豈不有夙夜之勞申伯於行是亦為文武之憲載惟令聞奚媿前修可

皇伯允弼授檢校司徒兼中書令改封東平郡

王加食邑實封制

門下國家膺累聖之圖啓中天之運重惟非德之嗣惕
若先猷之承仁恩滲於萬方親厚始於九族有如伯父
實曰賢王宜因涓日之嘉誕布告廷之渙皇伯具官某
氣和而履順資正而行恭源流發於天淵本支茂於邦
翰推河間之學務勤詩禮之聞蹈宣父之言思長富貴
之守服我文考冠於內朝以宣夾輔之勤以董宗盟之
事師壇命節既專仗鉞之行帝蹕陪輿又寵冠蟬之飾

肆紹休於丕序首旌德於茂親進班右相之尊視秩三卿之貴尹虞郊之舊俗裂汶土之輿封益以爰田衍之真賦褒隆邦錫美協師謀於戲念祖宗之基固起艱難之迹維骨肉之分敢忘敦睦之懷勉迪順猷永綏多福可

皇伯允弼授依前東平郡王加食邑實封制

門下朕乘初陽之序建大祀之儀親被鬯圭始見清廟夙駕齋輅肇禋紫營有昊博臨賜朕純嘏於時日景溫

霽坤倪肅清逮蠲熙事之成敢後茂親之獎皇伯具官
某性蹈謙必體函忠醇丕擁皇支之祥連為藩戚之表
董我宗正爰繫敘族之賢昨之東平每符樂善之美此
先帝之加遇而冲人之用欽會華玉之展祠被溫貂而
在位非神明接而福莫享羌親賢隆而教彌尊是用孚
慶第勞褒功錫號疇其多邑行以真租萃為寵章以煥
惠衍於戲躬天地之報既膺靈顧之私廣骨肉之恩用
篤人倫之愛往綏吉祿永懋休聲可

李端愿授武康軍節度知相州加食邑實封制
門下秉鉞臨戎式長萬夫之政分符作屏聿圖四國之
寧我得沈雄之英實出勲戚之緒肅申褒律誕布治朝
具官某氣和而弗流體強而不倚趨庭聞訓早從詩禮
之游累組承榮獨遠綺紈之習自居留務寢易年華肆
予親政之初間有納忠之益且平陽故館每念音徽之
遐而隴右名門終緣氣俗之勇是用按邊之鎖稽地之
圖付洋川之整軍擇彰德之便鎮就領將牙之重往專

間制之雄加食戶田併推異數於戲胡予轉恤戒祈父之靡聰雖不學兵佇嫖姚之前略益肩壯慮以稱茂遷可

賈昌朝授依前左僕射兼侍中鳳翔節度使進封魏國公加食邑實封制

門下王者誕膺寶命肇績丕圖協乾應於天飛渙風乎於邦號顧以涼菲荷於燕詒永惟訪落之勤參倚守藩之輔顯申茂冊告錫明廷具官某時推傑才早遇先帝

縉博極之學以勸講於禁中敷深厚之辭以鼓動於天
下寢發舒於美業既踐服於邇臣入持宰鈞遂冠謀於
巖廟出秉師鉞幾換節於齋壇至於珥蟬冕之華析麟
符之寄端朝亮采則百僚以師制閭靖兵則四夷之鎮
屬紹休於鴻緒益尊德於老成是用陟天臺左相之班
進方社元侯之律按圖胙國衍食倍封併舉恩徽以優
賢艾於戲周美申伯繫文武之兼資漢賴絳侯實安危
之參寄蓋履大任者有至責建茂勲者有遠名惟永令

圖以膺蕃數可

曹佺授檢校太傅同中書門下平章事加食邑
實封制

門下朕蒙遺休於上帝集大命於我家惕惟重器之承
浩若巨川之涉澤既更於民始勞亦獎於賢猷乃告大
廷用孚羣聽具官某緒承慶閼稟有忠樞遠驕華之末
遊傳竒正之舊學追武惠之烈早從清廟之祠念慈壽
之恩正極萬方之養故雖路車駟馬台紱將旄猶未足

以褒外戚之賢踵西京之事矧獲膺於繼序益申按於
陟文視以太傅之班易於昭德之節維爰田之既衍遂
真賦之載加議莫攸違寵皆是稱於戲親連肺腑可輕
富貴之來世載旂常宜念功名之舊勉殫誠瘁終保恩
煒可

寶安公主進封舒國長公主制

漢推女愛皆主上公之隆堯廣族恩遂變黎民之睦顧
荷先謨之托敢忘近屬之褒適揔政機誕盼廷渙寶安

公主生知淑訓日就芳儀維越在於妙年已積流於惠
問永念先帝實深天性之情載惟冲人尚輯國風之美
方鴻恩之冒物因厚意以展親雖無分玉之華亦有加
田之寵錫之大國蓋擬諸王之封益以長名用尊同氣
之屬以孚至化以應前彛於戲慰長信之慈維孝愛所
以型國考大家之誠維驕盈不可儀人往承之休益懋
爾止可

文彥博授樞密使改賜功臣制

門下天極環樞上通帝位之紀神兵會府內嚴師律之
謀朕方垂講丕平進經常武雖天下無事思備禦之不
敢忘蓋王者有征視安危之不敢忽適登髦傑資以輔
予具官某器閎而深材敏以濟早責賢人之業實膺聖
考之知以忠孝之名形國家之盛節以文武之略輯將
相之大猷肆纂命於皇圖迺離憂於喪紀迨終哀戚甫
見儀刑屬疆事之方興煩師旄之載舉折衝境外方將
出憺於王靈收畫幄中曷若坐圖於廟勝宜長機廷之

務亶符巖石之瞻於戲過餌戎羌未厭貪驕之志再盟
西夏猶苞狂忽之圖終佇奇勲用恢遠馭可

文彥博授守司空依前樞密使加封邑制

門下朕若稽先王維御羣品左謀金鉉之老以經治於
廟堂右屬鴻樞之良以定策於帷幄厥有成績可勿褒
庠具官某風力肅明器資恢傑臨至劇有轉圜之易定
大謀如執玉之堅逮事神文之朝已緝熙於鼎路追言
聖考之遇人密勿於機廷肆涼昧之丕承會精神於羣

慮雖兵民之異本亦文武之交修未隆贊冊之恩曷繼
圖庸之舉其保宏父允釐華陽顧豈名分之私終繫老
成之助於戲有若閔天尚迪文王之彝罔俾阿衡以專
商家之美往篤爾烈永承予休可

賈昌朝授依前左僕射觀文殿大學士判尚書
都省加封邑制

門下王者賦祿於朝所以礪天下之進君子避榮於位
所以杞天下之浮眷惟碩輔之臣遠領近藩之寄忽露

言於累牘願還節於上臺雖欲不從其情已至具官某
體忠忱之度蹈夷雅之方被神契於先朝奄元猷於二
府若舟楫之輔于濟有旂常之載厥成鄉更北道之符
爰錫西清之對雖舊德之加遇亦美謀之屢陳且申伯
言還式是南邦之喜而留侯多病欲辭萬戶之歸朕申
言爵齒之尊憫勞將相之事况文昌主揆素維師長之
崇祕殿敷經更得老成之助拓其奉邑行以真封庸遂
便安之私尚旌冲退之節於戲雖爾身在外常多王室

之思俾爾壽而臧終保公徒之盛敷于列位時迺之休
可

韓絳授金紫光祿大夫同中書門下平章事昭
文館大學士加封邑功臣制

門下三王臣主雖賢不能止誥誓之事二帝揆岳在內
其唯協天人之和蓋近跡狹而易循至化默而難運夫
欲馳寥廓之見舍攀拘之文大起不世之君須謀非常
之輔具官某蹈先聖之學躬上賢之姿思功名為己圖

慕忠義之前躅而復正色自峙頗有大臣之風臨機不
回多適庶事之要文武兼備其器股肱實繫其入朕登
延間材既偕羣策之慮度軼往制何愛隆名之私顧金
節之未還將袞衣之已屬其位百寮之冠以司大政之
元且唐相之願為良臣終受君以顯號秦穆之尚詢賢
老猶濟俗於多盤宣伊英猷不至上治於戲形范正金
錫美則為國利器之強陰陽和風雨時則為天泰階之
應往宣一德庸底丕平可

曾公亮授門下侍郎兼吏部尚書依前同中書門下平章事進封英國公加封邑功臣制

門下大火基宋實開五聖之符六龍乘乾遂繼中天之運乃睠近弼薦更三朝元勲冠於百僚利澤施於萬世載蠲穀旦敢告治廷具官某學通天地之微謀合聖賢之舉苞剛柔於九德固夷險之一心蚤膺皇祖之求爰履公台之位有臯夔之論能變堯民於時雍有丙魏之聲不改漢家之故事肆我文考遺予冲人咨顧命之老

臣輔初政於天下重宣至策終仰丕成進首中臺之班
往顯東省之務既疏榮於公社益躡數於爰田功之所
加寵不敢後於戲恐德弗類念高宗之未言俾民不迷
繫尹氏之素力共祇天監永協邦休可

曾公亮授尚書左僕射依前同中書門下平章
事進封充國公加封邑制

門下上天之緯運大時不能以全功睿主之撫統羣物
不能以獨化矧予眇德之御方搯萬機之難實仰成於

輔臣以經起於邦治爰旌丕烈庸告羣倫具官某明允
篤誠溫恭迪哲動合聖賢之檢言形社稷之忠蚤選聖
期遂儀台路子孟之承先帝預定於大謀召公之保三
朝率躬於一德乃眷宣勞之舊未昭報禮之隆其總揆
於中臺益侈封於大國加以爰田之數倍之真戶之輸
誕維寵章優我茂宰於戲王命山甫式是百辟之瞻天
錫魯侯祚爾千秋之福更恢遠御永弼昌圖可

曾公亮授依前同中書門下平章事進封魯公

加封邑功臣制

門下夫物生本孺天人道始於祖故有天下不可不嚴
大報為人子不可不怵孝思朕肇禋紫壇先薦清廟誕
舉合祛之事適遵定配之典維時顯相之臣有若元勲
之老宜先列位以渙丕謨具官某躬咸德之良履上宰
之任運理羣物人厚衣食之原鎮撫四夷時無兵革之
氣候景初至因丘自圜朕既執裸玉以見祖宗又將滌
牲器以事天地而上下莫不有嘉德內外莫不有歡心

高靈嘉虞休應顯見茲庸加爾以太常之功號錫爾東
魯之大邦而復益以爰田衍之真賦並躡寵名之異以
俾賢業之隆於戲考越紼之文知尊祀之不敢廢修歸
朕之禮顧神惠之不敢專往承之休更起予治可

曾公亮授檢校太師守司空兼侍中河陽三城
節度使集禧觀使仍賜功臣制

門下朕緬尋前載之文樂見名臣之節蓋位至者予國
心有加於澤民功成者本天道維在於挹已眷肅艾之

一德積勤勞於我家每循往詰之休不以三公為重誕
敷贊冊以告治廷具官某懷器適時潔身絕類蚤逢熙
於神運寔發縉於賢謨膺二后之顧言奉冲人於大統
自初輔政十有五年而四夷守於封疆百姓遂其衣食
匪圖近歲繼託一誠深據禮經之陳欲還君務而去維
終食而屢嘆卒高情之莫回况留侯未衰何遽遺於人
事且周公雖老顧猶在於京師其保宏父之居兼筦納
言之任高旌鉅節遙臨踐土之津閒館珍臺獨揖浮邱

之袂昭美勲於廟器抗逸志於朝倫雖云優賢蓋亦礪俗於戲以退為進蹈天下難儷之風不德其功應君子有終之吉往祇茂寵更穆英猷可

曾公亮授依前同中書門下平章事昭文館大學士加封邑制

門下王者攬髦傑以盡天下之謀總幾神以濟天下之務故君臣同力相得益彰陰陽並和以至大治適登碩輔庸告羣倫具官某德應中孚道經皇極躬清慎之一

守歷險夷之百為平咸之入商家雖載六臣之烈留侯
之安漢祚未膺上宰之榮朕拂龜而見祥端宸而定志
稽用師言之錫進居台路之元若股肱之輔予躬若垣
墉之保予室顧於倚用維以蒙成於戲覽前載之文考
名臣之事蓋創業之佐其迹易而守成之相其功難宜
勉輯於盛猷庶共恢於遠御可

富弼授依前同中書門下平章事武寧軍節度
使判河南兼西京留守仍賜功臣制

門下三台處中以裁萬物之化四嶽總外以牧黎民之
蕃如山河之經九州如股肱之衛一體出處之際朕無
間然具官某復貫有元蹈中弗勉學幾聖而獨至識造
物之未形貴名起於三朝盛德儀於百辟鄉召從於列
屏俾進翊於冢司為日尚新何恙靡已未及經邦之務
遽陳避位之辭詔雖屢而莫回章甫卻而復至朕憮然
自念嗟莫能勝既閔勞於政幾其聽遂於私佚建彼徐
節以殿東郊守茲洛符以保西宅仍位鴻鈞之貴尚優

黃髮之行於戲不處成功專老氏榮名之畏其旋元吉
要義經履道之終雖弗從於吾游亦自保於爾福可

祕書省宋敏修可太常博士供備庫副使李平
可殿中丞將作監主簿楊慥可通判保定軍任
粹可太常博士制

勅國家三歲稽羣吏之治有能奉吾灋而亡害者亦可
以褒次焉具官某學古從政裕於幹能今攷之有司而
功令當陟在漢曲臺蓋禮樂之司而髦彥之集也爾膺

是選可不勉哉可

御史梁椿可刑部員外郎直史館知襄州制

勅某官柱下者專肅朝綱直承明者並游時俊維爾文飾於事行敏於言鄉飾傳車之行迨還憲簡之責而屢形需牘蘄守便麾宜帖書林之華且易郎臺之序往班寬詔猶遲嘉謀可

韓琦授門下侍郎兼兵部尚書依前同中書門下平章事進封衛國公加封邑制

門下王者紹景炎之序履皇極之尊永維置器之艱屬
在佐王之略睠夫上宰翼我先皇適及委裘之辰肆於
奉瑁之始定策宗社貫心神明逮躬丕務之咨敢後元
勲之獎首粵邦渙誕告朝倫具官某器博而適時道闕
而濟物稟星辰之精粹會日月之休明歷宣外勞更倚
二柄蹈夷險之一節寄安危之大機仰文考之知賢絕
時髦而登用維召公之託嘗聞顧命之言維漢相之謀
終應大橫之兆蓋懷先見者識之邃決至慮者材之英

天扶不拔之基神贊非常之輔是用進文昌之卿序正
黃闔之台符隆以封爵之文益之戶田之數以蕃爾寵
以懋爾庸於戲天視靡私居飭有邦之畏民心曷戴一
歸厥后之仁念先猷之弗敢康顧成業之不可恃益經
茂烈永佐昌圖可

韓琦授依前同中書門下平章事進封魏國公
加封邑功臣制

門下朕考成命之頌以報天地之仁奏興安之歌以詠

祖考之德維燎升而至精薦維裸行而至孝通顧國事
之大不敢康本神惠之至不敢愛矧予秉德之輔固有
相祠之勞宜蠲嘉辰首告列位具官某篤亮廉正靖莊
簡夷辭氣涵和社稷之計已定誠明妥達陰陽之變已
調追言聖考之知肆及冲人之遺屬肇躬於元祀實總
使於先期鍾石在廷而繹諧籩簋在席而嘉潔感靈觀
之右荅底熙典之備成上功太常既為一代之寵析土
全魏又繼前人之休廣爰田之載腴倍貢賦之載厚庸

蕃爾數庸。爾猷於戲。上下合祛。日格羣釐之況。左右同體。盡圖有永之寧。往服茂章。聿綏純履。可。

皇長女德寧公主進封徐國公主制

門下周美王姬之華。下正后之一等。漢推帝女之寵主。同姓之諸公。故至愛形而九族歡。內則正而四海順。乃睦公宮之懿。適從世閼之速。宜合丕彝。用孚羣聽。皇長女德寧公主。僊支襲慶。邦媛流徽。鍾天性之深慈。躬女圖之茂矩。幼而勤組紉之習。亦既飭婦事之修。長則有

室家之歸將以經人倫之始維衿鞶之有命維車馬之
有行卜仲冬之嘉辰社大易之元吉瓊華在著已戒齊
風之滴粉水疏園莫如徐國之樂侈燕謀於皇裔充美
化於民間顯錫徽章大旌柔度於戲前檻唐家之制盥
饋不可以闕供近稽仁廟之櫛冠服仍從於少損蓋肅
雍者賢之檢儉約者古之師其體至懷自膺長譽可

皇伯兄弼授依前北海郡王加食邑制

門下朕肅膺駿命懋述先猷思所以廣嚴父之慈昭事

神之道而合宮寢制太微寓饗且皇祐之議猶參百靈
之從故辛亥之獻獨尊上帝之配相我大事時維茂親
休有寵章格於公聽具官某性資英邁檢履淳深天發
神明之裔世資忠厚之德每伏謁禁朝還咏燕室進退
亦有常處紛華而無流心考公子之詩既協關雎之應
受王者之社遂荒徐郊之封先甲告禋大宗董屬鳴佩
結玉以深齋戒之思重觴薦席又陪陟降之恪至精以
來神聽強立以旣禮成詳稽陟典之常表錫功號之美

胙之多邑衍之真賦且明宗周異姓之後兼懋帝堯九
族之和於戲福祿之臨有若岡陵之固急難之儆莫如
兄弟之懷茲庸展親其往迪訓可

皇弟頡授光祿大夫依前檢校太尉同中書門下
平章事充武勝軍節度使進封樂安郡王加封

邑制

門下朕躬大統之承憲前王之度並建宗子庸廣骨肉
之恩作扞皇家思長社稷之守方曠恩之澤物宜渙檢

之宣朝皇弟具官某體行端和神風華秀孝友自其天性忠謹承於世資蚤就學於奇觚已析封於寧宇念鵠原之愛嘗見急難之情嘉麟趾之風居多信厚之履屬肇親於庶政且徧獎於近支往踐鈞衡之崇益疏茅社之貴化繇近始愛莫爾隆於戲禮重周盟以薛侯而為後義形漢約非劉氏者不王懋昭淑聲永服徽命可

皇長女徐國公主進封陳國長公主制

門下朕承天纂極雖賴祖宗之休經國範民奚先族屬

之愛維是頒常之始矧予同氣之親敷告治廷嗣盼顯
冊徐國公主體專正愨德懋柔明蚤佩箴管之儀知女
工之無不至時觀蘋醢之奠知婦事之無不虔比從築
館之行每念結褵之訓應天飛於神運孚邦號於渙風
載荒南國之腴且儼沁園之盛化維近始愛實中流於
戲表鮑女之宗嘉外事之所不及抑館陶之子戒內謁
之不可興勉迪前規永綏令福可

順國長公主進封冀國大長公主制

門下朕承帝祚之來則知繼繼之所以重經人道之始
則知親親之不敢遺發大政於初朝錄羣宗於舊牒化
行編宇惠本皇闡順國長公主性疑而色恭德專而言
靖躬宵明之盛則慕彤史之遺芳蓋先朝同氣之親有
慈壽少女之愛雖湯沐之賦蚤視直王之所封而車服
之榮不以貴主而自侈肆纂承之末類懼尊遇之靡昭
重緣訪落之謀誕錫颺廷之冊既加之長號又謚以大
名載疏連土之腴式副諸姑之寵於戲王姬亞后本名

南之正風帝女開田用西京之故事往膺嘉數思廣徽
音可

集賢殿脩撰知鄧州張友直可天章閣待制知
陝州制

勅國家萃帝文於寶閣以待碩儒之遊析使符於劇藩
以寄良牧之任命兼茲授寵莫與隆具官某材資敏通
器韻冲遠邁時尚文之會承家清訓之傳內則參遷殿
之著書出則勤朱轡之問俗朕方思德於世闕採譽於

朝英宜延對於禁塗且往綏於關服夫政寬則弛事文
細則苛民分子西憂之勤倚爾近侍之望可

董戡起復依前保順軍節度使加封邑制

門下四封之守仗許國之素勲三年之喪為報親之達
禮乃眷西屏時維偉臣方終纂於戎縑盍還儀於命韞
我有明制格於丕獎具官某以材資之雄自高於夷落
以誠節之勁蚤衛於王家獨探神韜之奇時歸宰旅之
貢適靖邊瑣奄罹父讎起素經於廬中屬駢旄於閫外

銘在金石具獎一心之勤誓如山河盡荒先正之履維
是苴麻之飭亦既日月之除肆下書於外廷式加寵於
舊服胙以爰田之戶倍之真井之租用嘉乃勞丕顯亦
世於戲白駒過隙忽驚祥事之陳金鉞傳家更懔元戎
之略忠孝並務夫不美歟可

李日尊授靜海軍節度使加封邑功臣制

門下嚴帝親者茲維聖人之事觀禮樂者必於王者之
庭朕述三代之遺文宗五精之美報至音洽奏法物具

陳升柴燎之光以拜上旻之施零蓂蕭之潤以澤四海
之遐懋賞以勞頒朝有命具官某器懷英達忠義堅明
世享南交之封心馳中夏之化肆精禋之丕舉懷順節之
素勤錯事合宮有嘉方貢之舊策勲太寢疇先爵典之
行茲用錫號雲臺表功彝器衍以爰田之戶倍以真食
之科薦美壯猷益昭異數於戲教民以孝固以配文考
之功均國之釐不敢後列藩之服惟惠愛可以懷衆惟
誠忱可以感神往廸於休永綏爾土可

金吾上將軍除邊鎮節度使制

門下聽鼓輦則有將帥之思執干戈則有社稷之衛故
齋壇以重其拜侯社以寵其封匪咨材臣曷寄大事爰
諏令日以告明廷具官某忠義之姿剛正之氣向更使
祭有霜露戎馬之勞入衛宸居有夙夜軒墀之恪公
言來稔風績具宣朕惟師律之嚴安危所倚材不勝任
器將假人今其命汝大邊之衝百城之會旄鉞之盛爪
牙之雄爾其講軍籍之和輯民版之衆為吾巨屏殿於

一方於戲王柄之馭羣臣實先乎詔爵武經之有七德
所重乎戢兵惟方嚴可以懾羣姦之萌惟沈勇可以決
千里之勝往服休命無忘欽哉可

呂公弼授依前樞密使光祿大夫加封邑制

門下朕初承邦序適考郊年緣景德之祀文即泰禋之
齋宇乃輯大事以賓上神一心率祇萬福來下豈不繫
左右之輔時則有夙夜之勞因慶澤功不可稽命具官
某氣節修固機猷碩膚志薄羸金草勉韋成之學材施

廟棟夙推蔡伯之名被宸遇於三朝長樞密於右府肆
飭躬於肇祀能協事於先期使萬兵陳衛於國中四夷
觀樂於簾下而復奏中嚴於大次導初獻於重垓舉無
陟降之違終有質誠之助既蠲成於吉報宜大渙於神
釐載加馭貴之階載益表功之號仍敦封於采邑並副
寵於近司於戲德當天心已格靈娛之應禮行祭日且
觀惠術之孚益厲至顯共綏鴻施可

郝質授殿前都指揮使安武軍節度使加封邑

制

門下國家統御之勢大維持之業隆外倚四嶽藩翰之
臣中謀萬夫貔虎之帥故奉委裘而羣情固聞受瑁而
三靈趨輦肇臨發政之辰首下頒朝之命具官某性資莊
厚氣畧沈雄通玉帳之善經體金行之正氣自昔先帝
知為勁臣因其勤舊之名立在親信之地會綴衣之陳
牖提衛甲之環宮曾無夜罄之譁自得剛牙之重紹帝
符於景祚渙邦號於前藝視秩冠於文昌徒節臨乎安

武加以總正使範敦封并腴並旌巖陞之勞以表師干
之寵於戲天之壁壘象在羽林王之爪牙職于祈父蓋
地嚴則必資拱扈之力師衆則猶賴訓齊之方往堅壯
圖思答殊遇可

中書提點至堂後官制

勅某朕備法物之駕徂國郊之陽禮行而羣靈通德至
而休氣應慶孚有位驩浹亡垠以爾籍王官之華服宰
旅之裕肆崇丘之大報包治古之闕儀先庚詔令之明

亡慮案文之給肅成予祀均穆爾恩進陟美勲之名尚表諸曹之務益懷共慎以濟事為可

李日尊進封南平王加封邑制

門下朕荷上穹之錫命承先帝之顧言在疚而哀靡勝臨阼而懼弗類欽循故典大澤羣方咨爾世藩之臣虔於內貢之職匪申丕誥曷表嘉庸具官某忠實孝恭剛明肅果學洞詩書之蘊誠逾金石之堅地宅南交盡化海隅之俗義尊帝室常傾日下之心屬纂極之初辰謹

頌朝之大政定訪太宮之策趣論盟府之書進王爵之
崇徽益爰田之多賦以大爾土宇以華爾人民於戲銘
在鐘彝已載世功之舊誓如河嶽更均邦祚之長往廼
順猷永有吉祿可

皇伯宗樸授光祿大夫依前檢校尚書左僕射
同中書門下平章事充彰德軍節度使加封邑
功臣制

門下郊廟大事也禮莫盛於躬行天地一功也義蓋尊

於合祀朕盡奉先之孝嚴反始之文既獲能饗之名以
要三神之顧又膺無窮之祉以浹四海之歡矧我茂親
敢稽渙命皇伯具官某德莊而氣粹性靖而量夷系出
帝者之本支多閱天下之義理慕二獻之學自樂詩書
之聞聯三事之榮靡矜富貴之守屬至景之乘序即崇
丘而告裡綰佩無譁夙助齋居之恪盥罍致潔屢陪獻
禮之升維釐事之肅成方榮恩之誕舉雖無崇鼎分器
之錫亦有濮田多井之加既益號於功臣復進階於文

散以華邦族以變民雍於戲聖人因親必廣同宗之愛
賢者奉祭宜蒙百順之休其廸善猷永有吉祿可

張昇授太子太師致仕加封邑制

門下負高行者能厲世媿競之原保成功者為識天盈
虛之道故仲尼因浮雲而抗志老氏非拱壁之介心終
之氣擴而無不克力止而靡所殆有懷舊德之輔允廸
前人之休具官某躬賢知之資履將相之任收堂上之
奇策定禁中之大謀鄉解樞機之煩適從藩翰之佚受

遺之託終始萬世之安告老之書繼上三朝之聽朕篤
終始之明分睠春秋之素高其拜東宮之師以安近邑
之第雖送車之盛不及祖於都門而行馬之施誰若榮
於故里於戲閔勞官職蓋旌夫行義之尊思見老成不
愈於典型之益往綏茂履終憲惇言可

賢妃苗氏進封德妃制

帝居六宮之制率輔於皇猷天極四星之華實裨於壺
事朕嗣膺邦統思穆人倫褒臨妃掖之英化始宸闈之

順命龜薦日班綉布朝賢妃苗氏性資惠明儀度閒肅
居蹈箴圖之戒動循珩珮之和八月良家早被後庭之
選平陽別館爰開貴主之祥而能進遠驕華舉思謙畏
綸衣奉祀上以贊於后勤彤史流徽下以儀於嬪則庸
責德言之茂益隆位序之崇名以副勞議非能典於戲
坐而論婦之禮蓋視三公之尊內有進賢之心始安君
子之佐維正道然後式於外顧私謁不可黷於中往服
訓辭永綏寵命可

張昇依前同中書門下平章事充彰信軍節度使加封邑功臣制

門下夫燎升於郊而天地通祿將於廟而祖考格朕廸先王之典習三歲之祥事於上下罔弗欽飭於内外罔弗協肆被羣釐之委盍先同德之褒具官某躬端亮之風濟耆明之識外盡力以經四方之事內盡忠以導萬世之謀一節自夷孤衷易老屬肇祗於禋土適退守於陪藩載懷邦倚之良實契天飛之舊且師旄之重莫侍

屬車之行而方物之嘉有虔齋幣之貢顧上儀之不就
豈寡德之且能迺告外廷其位特進益以褒功之號衍
以奉邑之封稽于僉謀渙若丕命於戲報天之本既蕃
福祿之承答臣之恭又宏爵賞之施往綏靈顧益侈徽
聲可

集賢校理通判秦州陸詵可太常丞制

勅某太常禮樂之卿凡遷與丞者非文雅之望不在選
中以爾材識沈裕茂於士林向服書殿有繙經之敏比試

邊郡多投髀而解今攷諸功令而以歲當陟夫曲臺之
游金馬之直顧不寵顯哉惟爾欽荷予命可

皇伯祖承亮授檢校工部尚書榮國公感德軍
節度使加封邑制

門下蓋聞周興建土遂應年厯之長秦失罷侯靡復藩
維之援此國家所以監用往制封崇茂姻以夾輔於王
家以懷柔於天下肆膺皇緒渙舉丕彞皇伯祖具官某
躬耆德之英被忠訓之厚曾無車服珍寶之玩固有詩

書道術之明稽帝堯之仁疇先骨肉之愛顧秦悼之後
不減祖宗之蕃自居留務之榮浸廣皇支之譽按戊午
之新澤合南陽之近親華鄂承跼旌樂和於列邸犬牙
交壤寄雄峻於師旄既行爰田之封又倍真食之入助
建大統圖繫老成於戲積厚者流長雖本神明之祚德
隆者爵重況如宗族之賢均履多祥勉欽渥命可

皇伯祖承亮授依前感德軍節度使改封秦國

公制

門下國家世承燕謀天祚明德乃眷祖宗之裔未正封爵之科豈朕所以上隆尊統之風下形惇族之愛肆考厥典載謀有司其盼顯冊之書以孚羣位之聽皇伯祖具官某廣陵之嗣昭武之孫系出帝者之本支多閱天下之義理安處樂善匪車服能侈其心夙興奉朝雖風雨不渝其節故宗族仰其循則神明相之高年屬崇建於近親方按求於故壤自隴而右奄有土疆之長如麟之詩特旌信厚之履以應古之遺法以率民於至仁於

戲廣同姓之封大為藩屏之固觀盛德之世永保子孫
之休益懋英猷尚對嘉命可

皇伯宗諤授光祿大夫檢校尚書左僕射同中
書門下平章事號國公集慶軍節度使加封邑

制

門下朕纂臨丕基欽篤前烈蓋義尊序祖愛因隆於六
親治形於家風遂行於四海適緣曠澤先暨皇支皇伯
具官某器介而用通體莊而資裕多閱天下之誼盡讀

河間之書考潤卽之蕃誰及宗英之望追濮園之舊實
猶子愛之深比旌邦於師壇允夾隆於王室慶屬皇圖
之啓惠加同姓之褒其服大僚以卽台路易以近藩之
節倍之多邑之封雖本異恩亦稽先矩於戲唐封近屬
悉留京師之居漢寵諸王少在公卿之列維是高華之
保莫如法度之修矧屬英懷詎煩至戒可

皇伯宗諤落同中書門下平章事制

門下朕紹休祖宗崇建藩屏所以合邦族之愛厚人倫

之風雖於近親若共維之一體厥作棐德亦難廢於大
公皇伯具官某席慶皇支參華天路維安富貴之習靡
躬法度之修乃外招事權內轢宗黨知省券難分而移
文固析知宮寺有禁而遣吏輒通致風憲之上言加議
論之並起朕閔失戒慎務全仁恩其上丞相之章仍領
元戎之節欲止不獲誰咎之詒於戲臣無作福威以杜
諸侯之漸上不私賞罰以一萬民之歸宜勉自思庶復
來譽可

安遠塞普薩可充正軍主制

勅某世處疆垂氣雄種落能率忠力以遏外虞更馳威
名且固吾圉併推殊級用長諸豪勉服寵榮益思嚮順
可

王安石授金紫光祿大夫禮部侍郎同中書門
下平章事監修國史進封開國公加封邑功臣
制

門下夫天地至神也非統氣運物則功不足見於時聖

賢一道也非經世裕民則名不足見於後故士莫不待
辰而欲奮志莫如得位而遂行矧夫居三公之官而有
臨四海之勢豈不能究利澤躬義榮以事施於一時而
譽動於後世者哉具官某良心不外德性攸尊至學窮
於聖人貴名薄於天下不以榮辱是非易其介不以安
危利害辭其難方予訪落之初勞於用賢之務昭發猷
念預裁政幾衆訾所傷會靡捐身之憚孤忠自許唯知
報國之圖朕與其知道者深倚以為相者久茲合至公

之首肆敷大命之休若作室用汝為垣墉若濟川用汝為舟楫予有違而汝弼汝有為而予從於時大亨蓋出絕會於戲自成湯至於帝乙靡不懷畏相之心若孟子學於仲尼其唯達事君之道尚祈交勅卒俾蒙成可

陳升之除禮部尚書同中書門下平章事集賢

殿大學士加封邑制

天有三階則風雨不失其序聖如二帝然股肱亦繫其人朕上撫乾緯之明下慎國鈞之寄方審求於賢輔俾

參穆於政途若時登庸蓋出定命具官某識幾聖蘊謀
合皇猷學積於原而心彌充智酬於變而力彌裕早膺
仁祖之擢以遺文考之知肆予冲人克即大任問甲兵
則有鎮撫四夷之略問衣食則有運理羣物之心朕方
稽百王之謨經一世之績宜進躡於賢序以延登於宰
廷夫知歷選之既艱體委用之寄重則義莫得以愛已
道惟專於澤民豈特無疆之休亦有無窮之聞於戲論
金穀之計其歸內史之司作霖雨之滋是應高宗之命

往熙帝載庸代天工可

欽定四庫全書

華陽集卷三十八

宋 王珪 撰

制詞制

著作佐郎韓績等可並秘書丞制

勅某朕設爵賦祿以待天下之賢既因能而拔又校年
以陞所以盡勸下之道也以爾材質之美表于吏塗有
司鉤勞陟按歲格夫中秘之藏何書不有非士之高選
邪爾懋乃職稱予休命可

秀州司理參軍丁崇道可衛尉寺丞制

勅具官某爾獻策開邊作掾事郡詳明三尺之法善察
兩造之辭平處弗寃終更無過閱尉薦之牘多監司之
官與對便廷俾丞列寺當謹皮冠之守益圖藿食之清
取稱朕恩好為爾政可

改周惇頤大理寺丞制

勅惇頤天下元元之衆不可戶曉有能綏布吾化者非
郡邑之長耶以爾廉明幹給字人三年而所部數以善

狀言者覆于便坐宜有以寵異之擢卿寺丞欽予嘉命可

大理評事符拱之可大理寺丞制

勅某三載考績三考黜陟典也朕惟士之難進而時之易失恐在位者因有滯才之恨故輒三歲遷之而爾分治京局舉有善最叙進其秩丞于理卿爾其孳孳無怠厥事可

國子監直講裴煜可大理寺丞制

勅裴煜首善必自京師朕比延學官漸廟道義之源以
風勸天下以爾嚮隨諸生文在高等參講經席且有歲
勤擢丞京司尚懋時術可

三司檢法官張適可大理寺丞制

勅某大農金穀之司文苛則傷下網疏則姦寢以乘朕
比詔中銓擇廉平端敏之士庶幾閱法于中爾應選踰
年舉稱是職宜進丞於卿寺尚處律於計庭毋刻無煩
庸副予恤可

開封府襄邑縣尉李觀可大理寺丞制

勅某吏服郡縣之勞有能廉謹自將而應保薦之格者
朕靡不甄錄之况爾官于畿下而文學政事為予柄臣
沆所知擢與卿屬勉對嘉寵可

大理寺丞吳王宮教授周乘可殿中丞制

勅具官某朕念勞而不錄則材者懈過而均進則愿者
弛三年大比陟明黜幽其亦幾乎治矣爾勤學宮邸行
義有聞齎閱攸司寵進朝序勉思祗飭往荷褒渥可

保靜軍節度判官趙至忠可殿中丞制

勅某國家率三歲大比吏最良以甄勞而振滯也以爾
生于裔遠翻然嚮風服休以來秉誼一節今有司籍狀
未應陟文特寵盾省之聯尚留幕府之畫予嘉爾績其
戒始終可

尚服廣平郡夫人宋氏可進封祁國夫人制

勅朕選美德以充禁庭設內職以輔陰教矧小君之位
實參嚴近之防若大國之錫蓋昭名數之異以爾某氏

言容靚順法度雍穆入侍宸幄之遽協宣嬪掖之則宜
侈封于名壤更旌禮于象服其勉柔嫕以懷寵休可

御侍張氏周氏進封延安郡君尚服翁氏宮正
張氏進封安定郡夫人制

勅某古者天子之九御皆選用良家以聽天下之內治
今因勞加命所以旌賢德之茂以爾名閥之英儀于近
掖燕婉夙夜相予憂勤宜疏望郡之睽以侈封君之沐

翁氏張氏云以
正小君之號

箴圖是鑒思荷寵徽可

監保州鹽酒稅務孫華可太子中允制

勅天下之筦財利者課既有登朕又按其所舉以參見
其人以爾比釐事局舉最應獎儲禁之從有著在廷欽
對予恩益自勉懋可

監杭州清酒務孫觀可太子中允制

勅某漢權酤之法舊矣其佐大農之用甚澹爾被薦領
局于杭三年而有司較其歲入之課率羨于前今繇銓
版列朝路顧不為美陟邪益思報稱庸光所知之舉可

樞密承旨賈德明并五房副承旨等加勲邑制
朕順皇之德承神之尊廼候律元之肇以躬郊況之拜
竣祠隤祉浹宇敷榮以爾等忠勤飭躬強濟祕事樞衡
之地維宥命之是承戎祀之方靡舊文之不舉肆從嚴
向並冒蕃休胙爾上賦之田益爾茂勲之等咸祇于次
毋替厥勞可

招箭班殿侍嘗彥澤在班及十五年補承節郎
仍舊存留在班祇應制

勅具官某方罷遺衛士而次第官使之爾以藝成令祇舊次宜益矜奮以須後恩可

開封府推官王疇可開封府判官司封員外郎
馮浩可開封府推官制

勅某等推官王圻畫千里之廣京兆比三輔為劇朕命尹以表風政建貳以裨煩拏協相厥為思穆于治以爾疇文醇行潔專前史筆削之任而有灋可觀以爾浩學粹志和典太常禮樂之緒而靡墜不緝今雖即遷所以

旌歲伐初蒞所以閱其材然朕待時峻茂之德益有華
近之綴無忽廼命當始茲舉可

三司判官轉運使等加勲制

勅某官某等朕承神至尊懼德不明于禮樂廼飭躬齋
已以大報于郊遭天地况施禮成熙明嘉與士大夫共
應茲祉以爾等膚敏之器咸儀王朝固有握計籌於中
將漕車於外而夙夜勅職之勤肆予祇見上帝而相祀
者德莫不顯述職者貢罔不虔若時大賚於天下維邦

之彥庸可後褒烏虜茲用命爾以勲邑之等其克懋承
於王休可

內外朝官加勲制

勅某夫郊報所以反物之始惠術所以觀政之廣朕親
陟泰畤靡神不宗樵蒸配黎休氣蒙被伊嘏上帝豈予

敢專思與辨朝之臣

致仕即云雖爾謝政之臣思亦均
邦之釐分司即云雖爾分務之臣

謫官即云雖
子謫弛之臣均邦之釐以明乾施之無不決也條以勲

等其懋承之可

直龍圖閣盧士宗可天章閣待制兼侍講制

勅朕迹前王之治惟朝廷尊鄉儒術以化天下故當時
風美而後世稱盛肆朕祇廸先猷輯祕文於內閣所燕
見紬繹皆俊德碩望之臣以論思於治道非有意於斯
文邪具官某行實純備稽古甚力朕聽政之餘躬即講
帷爾嘗据經守正從容為予陳聖賢之論者固有日矣
朕思置爾於法從之列而咨於弼政僉允爾材茲朕所
以崇獎道藝之本意也使軺北旋綸書下省其一時之

極寵與可

衛尉少卿許宗壽宋純可並光祿少卿制

勅某等朕念勞而不錄則材者懈過而均進則愿者弛
三年大比擢升吏最其亦幾乎治矣爾等貳列卿寺久
宣外勤稽年按閥遞進榮秩爾克勉楸欽荷褒渥可

步軍都虞候王從政可馬軍都虞候捧日天武
四廂都指揮使王興可步軍都虞候制

勅朕之親衛諸軍虎旅百萬蓋天下武鋒之萃也既建

三帥以護周廬之師又設候奄之職以訓齊政令凡被
予倚莫匪沈銳忠實之人以爾具官某起於舊門服詩
書之略以爾具官某奮於尺籍馳介馬之勞內則拱嚴
宸居提禁屯之一律外則遏衝邊服憺天威之四馳益
遷徒騎之虞更重爪牙之寄夫待奇功者維寵之厚報
榮遇者惟節之堅勉立壯猷祇懷休命可

捧日天武四廂都指揮使眉州防禦使紀質可
侍衛親軍步軍都虞候制

勅環拱周廬法十二星之衛參提禁旅張百萬師之雄
必資爪牙之良以重心膺之寄任無輕受議出僉諧具
官某沉勇不回忠謹因劬奮於行伍而積戎馬之勤守
在邊防而揚鈇鉞之怒比遷廂部之領益嚴城徼之呵
屬疇次於事勞宜進聯於候奄總天下之勁實壯師兵
之權扈殿中之嚴更虔夙夜之警勉思勤瘁茂對恩華
可

屯田員外郎李宜卿可都官員外郎制

勅某夫類能於朝則治益起稽伐於歲則勞不遺以爾
文雅濟其家幹明精於吏鈎財計之府則曰治貨有美
資佐浩穰之都則曰應煩有餘力今秩雖序進且年靡
常拘往祗都隸之榮以美天臺之望可

降授屯田員外郎知濠州吳祕可都官員外郎
制

勅某向以坐舉不明絪於有司之議御史中執瀟言爾
所薦未嘗用而吏更因它章以冒寵格今而緣累理有

足矜中都副郎復秩華省往班郡詔祇予茂恩可

虞部員外郎王仲莊可比部員外郎制

勅某古者三歲大計羣吏之治無功不徒廢必罪之今則惟坐累考延考課之期耳斯為恩厚不已至乎以爾久服周行亦更厲使當遷而緩省咎自新尚推進陟之命俾升總勾之秩毋忘修飭答我優渥可

太常博士秦玠可屯田員外郎制

勅具官某尚書郎起草中臺平治奏事副員之選自昔

擇能爾器識見推政學多裕積勞登考宜豫升遷承務
文昌往欽乃職可

太常博士劉啟可屯田員外郎制

勅某欲治之主日以急天下士之材然朝廷之進人不
次所以待異等稍遷所以勸羣品其常典也爾繇詞雅
進而精於吏職之幹嚮被辟在邊而疆場之不聳非爾
幾畫之助耶今旌勞而遷雖未為不次然與夫累歲月
者異矣太微積星進表郎位顧非美陟虜可

侍御史知濠州吳祕可降授屯田員外郎制

勅某賞罰二柄王者持以示天下之至公也爾頃在郡時薦所部吏廼今黷賄麗憲汙於朝黻坐舉之責朕不得私於爾也降處郎秩尚領州符體予寬恩往省以勵可

國子博士知瓊州曾楷可虞部員外郎制

勅某嶺服之外去朝廷萬里二千石得專休戚朕哀憐遠人思得良吏故著令代還有治狀者必甄獎之蓋所

以示勸沮也有司言爾剖符瓊山能奉法循理民皆安之副我委任之意朕良嘉焉俾自庠序陞於郎選其思報稱無忝予命可

知孟州河陰縣事張鞏可虞部員外郎制

勅某大河浩浩醴流東注然墊溢則傷隄防壤填則難漕引而歲以是患之爾之視河能順從其性使亡湍盈游貯之害而利及於京師今命爾以郎臺之秩其率職祇寵思勉前功之休可

提點淮南刑獄公事度支員外郎孫錫可司封
員外郎制

勅某爵祿天下之公器也世治尚文賢能衆多可無甄
序之法庠爾早以詞華與游文館自委劇於中將憲於
外而臨事敏發見稱良能夫三年大比隆周之典也朕
惟賢者固不以積日之勞而朝廷所以官人之柄寧可
廢諸宜進中臺之秩且隆使範之寵可

集賢校理馮浩可司封員外郎制

勅某國家稽漢石渠故事貯天下秘文以萃雋髦之游
居以養美材進則階清序而朕之獎遇常右也以爾懿
文雅望逢辰休華自筮書林優游歲月古今之所殫見
道藝之所滋立今有司鈞勞繇判租外列登主爵要曹
顧不為美陟耶慎名秉德其勉茂命之承可

空名試將作監主簿制二道

勅某朕臨遣樞臣撫荆蠻之道申國威惠問民疾苦庶
以綏吾遠方者以爾適被使指而應幙府之畫一命之

賞庸嘉爾勤往祇吾恩思所以奮勵可

勅某朕臨遣使者撫江湖之道而發師調兵美民清俗
期足以懷吾遠方者爾亦馳驅其間而書幙府之効一
命之賞亦勸其勞起承吾恩思所以奮立可

欽定四庫全書

華陽集卷三十九

宋 王珪 撰

制詞制

虞部員外郎魯有立姪君貺可試將作監主簿
制

勅某爾祖昔從東儲敷我德義迨予置諸政路而維是
勞之一心嗟嗟舊門乃至不振今有立願還歲代之陟
覬錄其裔孫朕念名臣之後且嘉爾季父之請命試工

監起承而家可

山南東道節度推官趙燮知梓州通泉縣制

勅某朝廷以民為重而遠方之俗尤可念哀非得良宰
不能安輯以爾敏廉為縣比有善狀故升戎幙復委百
里任不輕矣汝其懋哉可

安遠軍節度推官杜行可知鄂州江夏縣制

勅某比涖爾封善綏吾俗悉力禽暴應在賞條預升賓
幄之游移領縣章之制勉勤異迹思對殊休可

監在京豐濟倉龐釜可太子右贊善制

勅某服蔭清門厲廉公路歲勞稽狀遷格孚文進參儲
采之聯尚臨京庾之給勉思端飭茂對甄榮可

監韶州大興銀銅場陳謨可著作佐郎制

勅某天下山澤之利贍國計者於南方為饒然非幹廉
者涖之則利散而用日橐矣爾筦臨大興歲溢銅數百
萬計有司薦勤疇以遷格蘭臺佐譔應寵甚懋可

開封府功曹參軍申宗諒可著作佐郎制

勅某京邑之治掾曹皆選掌稽功緒兼讞刑章若考薦
並登則增秩留處爾詞秀優仕善職此官命佐撰於道
山且次令於尹府是曰褒渥勉祇乃躬可

刑部詳覆官張詵可祕書省著作佐郎制

勅某秋官覆天下之獄而其屬能平其所疑廼為稱職
惟爾詵以藝文進而被有司之薦持灋強明課中歲格
東觀篇籍時雋所游欽吾茂恩而慎而守可

知廣安軍渠江縣石禹明可著作佐郎制

勅某以辭藻決秀科以端廉敏政事迺閱章薦交軍府之聞又覆吏郎如選部之最宜與游於東觀且參繹於祕文勉服茂恩毋墮素守可

虞部郎中監曹州酒稅馮況可駕部員外郎制勅某夫人子之事親也不敢違朝夕之養汝頃者委親而之官於孝之心安虐迺言者謂汝親有去里之難而勉汝使行是則不孝之迹良匪然邪今因郊布澤還汝中臺之秩汝親謝矣不可不務忠於王家可

將仕郎守祕書丞楊儀可祠部員外郎制

勅某朕以季商吉卯饗成路寢天下靡不望澤况吾儒
林之彥廼卒見廢者邪以爾雅遊道山敷藻有裕偶罹
謫籍淹遲江湖朕維思議罰之過而往或莫申推惠之
嗇而疏者未錄茲復爾省署之秩寵以軍壁之符其懋
於修以對予之嘉遇可

故西上閣門使知雄州李緯可贈陵州團練使
制

勅某夫生履顯位於朝沒則加褒襚於第若夫與班於
材武厯力於疆陞忠瘁所形恩禮宜異以爾器懷端厚
風尚沉雄介馬馳於邊勞詩書輔以帥畧方倚謀於閭
要遽興愴於朝晞空見金城之圖靡及玉關之入持峻
陞於廷引兼遠視於兵團緬惟英魂歆我閔惠可

六宅使曹沔可榮州團練使制

勅參使於中則榮禁路之游團兵於外則雄邊瑣之寄
疇懋殊東庸旌夙勞以爾具官某籍系緒之腴更事局

之委自陳久吏之迹并傳先臣之功朕參條最闕則奉
職循理亦足為能者之勸緬懷舊勲則講好息民固已
成天下之利宜推厚秩之寵俾華前烈之承舉洽優褒
益思忠飭可

成州團練使聶用可千牛衛大將軍賀州團練
使制

勅某夫嘗從事矢石之間及年至而力殆也朕猶以優
遇之良以勉吾士也以爾束髮叩門寢歷高爵迨於暮

齒閔勞邊隅今寵以環衛之尹寄以團結之秩尚俟爾
志益欽朝榮可

龍衛右廂都指揮使謝榮田辛進封開國公加
勲邑制

勅某朕本祖以達萬民之孝因郊以通三神之歡盡忠
齋明受福穰簡既以孚邦號之渙時則寵戎衛之勤以
爾分總禁屯參持州契忠誠貫于金石武力雄於爪牙
比講事於郊丘方懔威於邊圉

田辛云叱嚴驚路之行實董虎賁之扈已

祀布慶在律先勞加賦以衍于采田益勲以載之盟府
一心是報百祿攸宜可

北作坊使郭諮可英州刺史制

勅某朕惟井絡要部葭萌故川差求武翰之良慎付兵
屯之寄以爾器謀沈遠風力銳強守在邊鎖之選雅有
戎鈐之畧濟民綏靖邕國威懷宜領刺於方州留護師
於一道勉資茂寵無替嚮勤可

文思使馮承用可忠州刺史制

勅某夫珥璫中侍以任要為材握節外刺惟勤顯廼陟
蓋臣無小大必以力爵無重輕必以公以爾知敏而通
性良且慤早共軒闥之奉屢訪邊陲之幾以至錫鄰域
之深歡省寶文之鉅費効雖素輯寵不橫于自總北門
之屯實雄一道之禦未申前獎奚勉後勞宜分郡契之
榮尚寄戎鈐之重靡褒不厚其惕而承可

洛苑使裴德輿可英州刺史制

勅某以景至之吉大報于郊禮成熙明天下蒙澤爾早

以器畧撫邊之衝靡先謀而折姦亟因累而褫秩且念
歷歲之久良增守方之思握使符於外臺護師律於全
晉稍還舊服往飭新書可

如京副使劉用可南作坊副使知瀘州制

勅某瀘州會江地控夷落實賴守牧俾制疆隙爾材武
著稱知識兼裕早繇選任膺此寄推且聞薦陟之留方
藉撫綏之効宜遷使秩仍總郡章三年最成期有它渥

可

贈團練使何宗父均可千牛衛將軍致仕制

勅朕惟南征之際仗節之士其趨赴死難者固已追寵之又思褒其親以錫忠孝之類某父憑德之厚克生俊臣分提王師以靖蠻孽而遭命遇害悼于予聞眷爾衰年創深子舍持陞環尹之列且慰下泉之思哀榮之隆尚體予恤可

母太原縣君王氏可封太原郡君制

勅夫為人母者靡不欲其子之有聞於時若捐軀萬里

蹈於忠義之途者此今昔所褒雖沒其猶榮虜某母某氏慶閭之賢實生良嗣毅然秉節期掃弗庭力敵摧堅至於被害親慈之念予懷與均特疏列郡之封庸慰幽局之慕愍存旌往寵於忠門可

妻河南縣君宋氏可封河南郡君制

勅國家念勞之典亡所私恤遺之禮靡不致蓋於國事之報盡則其私門之澤深某妻某氏秉婦德儀勉夫忠義載惟死節之際方深晝哭之哀疏封郡田慰念泉夕

存者被渥沒其有知可

崇儀副使劉溫潤可禮賓使制

勅某使秩峻於內朝戎鈴統於一道非沈武之選不足
佐事機匪勞能而遷何以勸邊服凡被予寄良難其材
以爾謹畏周旋而厯軒闥之勤忠力親信而執威械之
衛間因便坐數條利害之宜願試二邊居多忼慨之志
歲勞既上軍績亦聞宜正中墀之班益嚴西戎之護廼
心夙夜以答寵榮可

內殿崇班閤門祇候曹伉可禮賓副使制

勅某繇閤門之家預軒墀之籍雖歲勞之未著屬坤禁之有陳進躡常資貳華諸使懋以忠力對於異恩可

皇城使封州刺史康德興可西上閤門使制

勅太微法宮極帝居之邃朱華右閤導王命之嚴式咨材良以長儀度具官某器懷沈武咨尚謹孚領戍邊衝自雄北道之禦總徒提役卒固大河之防朕前詔有司俾甄廼績按期茲至齋伐自言宜陞使範之華尚寄兵

鈴之重寵榮其厚忠蓋是圖可

引進副使張希一可西上閤門使制

勅自戎方講和五十年疆陲晏然被邊之臣能威重自持而輯耕守之備者已足任吾事然稽勞而賞茲又邊瑣之賞勸也以爾具官某勲舊之門材畧兼劬易水匯關扼虜境之吭爾總屯訓師從容樽俎之安者彌年於茲矣朕惟內朝之使若朱華二閣贊相上下特為榮近推而命之顧不為美陟邪往服舊寄永肩一節之報可

侍衛親軍馬軍副都指揮使張茂實加勲邑制
朕以仲冬吉已祇事丘疇陟配三后記秩百神諸福之
物擁佑來格均施之澤宜自近始具官某卓有材武而
經之以智畧審練事經而濟之以忠果踐歷煩劇周旋
信遇擢總勾陳之重益修拱衛之嚴自法輅之啟行汜
泰壇之竣事天營有謐蹕路無譁顧是忠勤用推慶賞
勲名功號率躋等夷益虔乃心以永來譽可

降授朝奉郎權通判建康府徐堯任國子博士

日奏對失儀降官特復朝散郎致仕制

闕庭之禮陵三軍者懼焉以其嚴也爾為博士長而進
退失容至於鴈秩朕豈深咎爾耶丞郡亡何聿來致仕
母乃敬畏過自刻乎俾還舊官示棄前咎則朕之遇士
大夫明恕兼矣可

前秦州成紀縣主簿張昭壽可國子監丞致仕
制

頃承先蔭數調中銓因歲積勞以疾謝事俾通宰序之

秩且遂里閭之安勉服厥休益綏所履可

潁州團練判官馮承叙等并轉官致仕制

古之仕者既強則勞以事君及謝則為鄉閭之所尊表而君子謂之知止爾效官之久寡於尤違今引年以歸

寵爾朝綬

李象成云寵秩庠序
趙熙載云寵秩書省

不亦始終之休歟可


海州團練使史吉可左驍衛大將軍致仕制

勅某爾壯而奮於戎馬之間逮年之至也自審力之不能願還君事以保其衰癯朕有嘉高誼且不忘爾舊勞

其以大將軍之綬歸寵於家爾其持紳蹈齎永懷天祿
可

知容州普寧縣事彭亞可光祿寺丞致仕制

隨牒之勞誠困遠適嬰疾之久固請謝歸宜參京寺之
華且遂家居之佚益綏所履以荷吾恩可



欽定四庫全書

集部

華陽集卷

四十至
四十五

詳校官庶吉士

臣李如筠

檢討

臣

何思鈞覆勘

謄錄監生臣龍舜耕

謄錄貢生臣吳士英

謄錄監生臣孫汝明

欽定四庫全書

華陽集卷四十

宋 王珪 撰

制詞

制

策問附

端明殿學士禮部侍郎李淑可起復舊官制

勅銜親之哀所欲喪禮稱愛君之義不以家難辭睠予
近侍之良比懷罔極之慕宜隆恩體且抑孝思具官某
以知覺民以文華國感會盛際徊翔顯途典命禁林發
揮帝王之鴻藻陪學經席貫穿古今之治源以賈生之

才論嘗先於諸老而望之之蘊意雅在於本朝適深顧懷薦屬艱疚哭踊既卒可斷門內之恩訪對所思勉就殿中之業起服予事尚資爾忠可

太常寺祝充集賢校書鞠真卿服闋可舊官制勅某夫執親之喪三年不從政其於創鉅之情可謂至矣爾籍在道山銜恤去秩歲月之久祥琴既聞勤思顯親往祇舊服可

見任兩府奏薦子孫弟侄制

勅某朕以景至吉序祇見上帝惟是一二股肱之良罔
不肅雍以顯相予祀朕思寵延於家共樂無疆之休爾
母忝厥命尚勉脩於厥躬可

在外前兩府奏薦子孫弟侄制

勅某朕以天元穀旦郊見上帝有懷一二舊政之臣亦
既均邦之釐又恩寵延於家共樂無疆之休爾母易厥
命期勉脩於厥躬可

內殿承制高遵望可領右軍衛將軍致仕制

勅某勲勞之門早服禁陞嬰疾之久自陳不能宜升環
尹之班俾遂家居之適往綏吾渥以保爾安可

先朝鄉貢三傳張自成可奉禮郎致仕制

勅某朕惟漢恩入人之深者豈惟厚長老恤孤獨之致
哉以爾頃在先朝嘗賦里選今延對便坐高年不衰命
爾太常之秩安於閭里之養涵濡天和服我休寵可

禮賓使劉溫潤等可英州刺史制

勅具官某自西夏附款以來疆陲晏然亡兵革之警迺

天水以西氐羌小種乘間寇邊勞我王師爾等毅然奮
勇身先兵鋒奇謀銳氣一舉而尅天威申於殊俗戰功
上於幕府或分刺史之寵或介使聯之華何念家為以
罄於一心之報可

供備庫使王仲平可昌州刺史制

勅某夫執威械以侍朕左右者莫匪親信之臣其夙夜
之勤朕固嘗疇以華近之陟况久從邊鎖之寄辱爾籍
在內史而器略靡倫謂軒闥之間不可以持日冒寵廼

慷慨請外思欲功名之奮朕嘗竒之今屬鞬之衛六基
於茲豈無宿勞之獎耶往分列部之刺留安西顧之撫
褒章之渥益厲迺中可

供備庫使蘇安靜可忠州刺史制

勅某河東近鄙俗尚氣勇左有常山之險右有大河之
固列於勁屯委在專轄以爾早從中侍名有幹資自馳
戎馬之勞頗習疆場之事薦屢騰於師牘功累試於邊
衝宜即使聯往分郡刺朕雖懷軒闥之舊且重股肱之

處尚倚前略以安外虞可

供備庫副使沈惟恭等可康州刺史制

勅某等朕以景至之吉大報於郊禮成熙明天下蒙澤
以爾等向護靈館火禁弗嚴緣灋解官省咎不懈方州
握符之重西閣宣詔之榮並膺新書往祗舊服可

贈六宅使王永吉可贈高州刺史制

勅某朕常思嶠南之戰有仗義死節而褒或未至者今
使者列爾向離難虞賊屈不拜毅然秉色至捐軀命不

有旌顯何以勸忠州刺刻章再飾爾隧庶夫英憤之魄
識予哀寵之厚可

內藏庫使李定可皇城使制

勅某蠻荒弗諱毒我五莞勞師谿谷之間踰時未殄朕
思勁武沈慮之才能佐吾將略者寵而遣之以爾忠果
嚴厚練達武事故命爾冠諸上秩統一道之兵爾其訓
厲激發有足以張吾軍勢者一舉而克之朕不有豐賞
於汝乎可

東上閣門使李珣可德州刺史制

勅漢制刺史二千石以宣詔美民蓋古方伯之任稟厚而秩尊矣今雖寓於武聯然被真寄者非勞且舊則疇克承之具官某風矩淹華器懷沈裕侍宸嚴之邃而儀度無不輯總京務之劇而綱領靡不振朕念長樂之奉欲養之不及眷渭陽之家思寵之未至况爾天資之茂越予戚畹之望特分命於州檠將試才於邊鎖勉思忠厲庸稱恩休可

西上閣門使李惟賢可高州刺史知莫州制

勅刺史古要官也漢制乘傳行所部唐命持節督一州
然其任皆重也今遙領之寄雖以為武列之寵且稟厚
秩尊非夙有望者未易命之具官某維爾祖父三世秉
鉞元勲之門焯於金石肆爾孝謹忠勤職予上閣之事
贊相儀矩間或敢言戎人奉觴諭以非禮茲豈庸庸之
所及耶朕思又安襟喉之要故兼以刺符而臨遣之噫
男子有四方之志則功名富貴非安然而可圖也況爾

家傳將畧之舊其慷慨北行以寬予閩外之寄可

皇城使王遂可坊州刺史制

勅某朕惟自昔英毅之士固有遭困而立非常之功夫
可攀拘於小文哉維爾戎寄之舊被憲絀官屬王師南
征迺厲然思奮戮力殄寇憺天威靈前詔郊燔之期復
寵州契之命夙勞是念慶典其孚勉而忠圖以報榮遇
可

內藏庫使王守規可榮州刺史制

勅某官刺史古要官也今或繇內諸使遙以領節者非顯有庸績豈輕予哉以爾忠庀事上出入有年向圖靖館之新以肅颯游之奉而庀司興事匪日告功與其環歲之勞疇以分符之寵考期適至按閥具存往服殊榮益懷異報可

崇儀使蘓紹榮可六宅使制

勅某朕闢冊書之府延豪俊之游又擇親信之良以典編摩之緒以爾參華使輟與職祕局爰質課於歲勞適

應文於遷格宜膺親宅之領益峻內庭之聯往欽寵優
思勉共慎可

崇儀使劉永保可六宅使制

勅某內庭之謁日趨於禁嚴諸使之行並寄於材武以
爾承世閥之慶歷墀途之榮迨試事局之煩良涉歲時
之久顯有官効應於陟文宜進近班之華益申外戚之
寵在公一節報國殊休可

內藏庫副使武戡可六宅使制

勅某爾攝在絕塞而本道表爾沈勇有材可任以事朕
不惜高爵所以勸守邊之臣遷以親宅之使正於軍壁
之符飭躬忠勤以報國之榮遇可

崇儀使賀州刺史王從政可六宅使制

勅某鞏洛之興三陵所宅嘗委信幹之臣以守衛之以
爾夙侍軒闥服朝夕之恪迨祗園寢積歲月之効宜峻
內庭之列以華親宅之使尚肩忠慎思稱褒寵可

禮賓副使謝雲行可六宅副使制

勅某帥臣琦以爾天資勇果武藝絕人草城州當河東
要害之地爾被邊三年治甲練師威望聞於營中朕用
委以軍壘之符遷以親宅之秩其勉圖功名尚有不次
之擢可

右騏驎副使蔣揆可莊宅使制

勅某全蜀之遠朝廷所留顧也地阻而易恃俗輕而易
搖故鈴兵之官非沈武而凝重者未易遣之樞臣言爾
稔於邊事有綏遠之材朕特正內使之列往參西維之

護猶有茂寵以酬後勞可

西京左藏庫副使宋有言可莊宅副使制

勅某太原一道勢迫西羌凡被寄者非沈武有略之人
朕未易以遣以爾向總邊戍迨茲有年士馬精強兵械
完輯宜峻廷內之秩益華使介之望勉思忠瘁以荷寵
靈可

西京左藏庫副使張搢可莊宅副使制

勅某昔者西師在邊爾嘗戮力兵鋒之下第勞者多今

監司為言猶鬱於進拔之路高爵厚祿所以待能也夫
豈啻邪其躡常資庸為邊吏之勸可

故右班殿直陳孝先可贈南作坊副使制

勅某日者遠蠻背恩旅拒篁竹之間寢以稽戮爾憤疾
狂寇奮不顧命勢寡力迫離於賊鋒朕嘉死事之節特
厚恤終之典命諸介使寵於忠魂可

崇儀副使高遵甫可北作坊副使制

勅某內庭諸使之介已號華資中禁近屬之親宜霑異

渥益進丹墀之綴足光貴閥之承勉思端勤以忝褒錄
可

供備庫副使藍元震可文思副使制

勅某維爾兄元用事朕左右小心一德今夫往來聘好
之事朕所劇委也乃引年以辭願澤其天倫之親矧歷
載之勞庸勿褒擢進爾優秩以眷中侍之厚可

西京左藏庫副使張惟志可文思副使制

勅某朕惟陵域之奉非忠慎而良幹者疇委之以爾藉

在軒闥嘗所親信且內庭諸使職儀有等而遷貳近聯
朝寵益赫祇事園寢勿懈朝夕可

西上閣門使劉貽孫等加勲邑制

朕薦美樂於清廟以歌舞三后之功奠吉土於崇丘以
神明上帝之德坤靈祇於右席乾文燧於泰垓精誠孚
通景氣休晏思與禁途之列共綏純貺之蕃具官某等
懷幹肅之資濟沈銳之畧或詩書自高於閭外或矢石
當勤於兵間早服華於近墀預相容於當依適躬肇祀

咸寄在邊肆於熙事之成首以慶條之舉隆階衍賦均
獎爾勞可

供備庫副使張昇可西京左藏庫副使制

勅某朕用内外文武之臣凡建功立事者待以不次之
賞積日計勞者抑有序進之法庶幾材能者自取高位
而循謹者亦不遺滯焉爾以歲課來上其命增秩勉思
功名朕豈吝賞可

供備庫副使馬慶等可西京左藏庫副使制

勅某等朕惟材武之臣遭時上文雖不能施汗馬之勞而奉令循理者匪繇叙進之法則何勸焉自宗祀均寵五載於茲其可以甄勤而錄滯矣爾等雅有器幹更於事任今有司以歲閏來上其職脩事舉審若所陳咸命增秩體朕所以礪爵賞之公可

西京左藏庫副使蘇安靜可供備庫使制

勅某太原鴈門扼晉山河北有強敵西有勁羌蓋天下精兵之處總戎一道非材畧之武則疇若予寄以爾嘗

事朕左右而忠慎幹力有足稱者今薦形帥府謂可任
以邊幾宜擢諸使委以鈐護之職其竭心迺事以報國
之榮獎可

內殿承制王德豐可供備庫副使制

勅某五嶺之南谿谷之險篁竹之翳而蠻獠間出為患
爾督兵桂林能使不敢騷擾境上終更而還擢貳諸使
不曰寵辱可

內殿承制郭元方可供備庫副使制

勅某邊事寢寧而領戍者雖無汗馬之勞然飭備威夷
日不敢弛歷年於茲其勤固多忽而不錄能者何勸是
以升介內使之列且旌遐徼之護思服徼寵益脩乃職
可

河東轉運使周沆可三司度支副使制

勅大司農移天下之用其佐皆資望之遷蓋國之大計
不可假人具官某沈敏之識彊濟之具鎮臨荆湖而威
惠申於夷落轉餉并汾而兵食雄於邊鄙嘉爾績効稔

予聽聞茲念使車之勞宜留會府之畫凡賦輿之所瞻
金布之所度亡歛克以匱下亡煩苛以傷公務協公道
時乃之職可

工部郎中張拱可三司戶部副使制

勅三司置使以總天下之計左戶設貳以節邦中之賦
思得時髦之敏助宣財府之畫允曰劇選幾於近聯具官
某詞華粹清業履敦劭厭直承明之舊將漕井絡之行
使遠民之沐上恩而屬部之懷使範比奉終更之對有

慰前席之恩美閼居多嘉論罔伏宜參司會之職以裨
經費之方素稔良籌詎煩深訓可

故興平郡主趙氏男供備庫使曹偕可如京使

制

勅某朕之諸姑惟興平之親乃降齡不淑奄嗟淪謝遺
孤之託可不厚歟以爾偕屬韃左右稔著忠力銜恤之
際良軫予懷升峻使聯尚體寵典可

太常寺太祝王廷老可光祿寺丞制

天下之娛承平久矣士不由藝文進而履華顯者希惟爾名家之韻習不外休少勤詩禮之樂比躋英雋之第今序年充格而鈎課應蕃進丞內郎漸於榮轍可

知杭州錢塘縣鄭民彛可光祿寺丞制

勅某朕惟世祿子弟多溺於綺紵之間而鮮克令器惟爾名臣之後穎然好學迨試禁林而綴辭雅麗參列優等迹其官簿且有歲月之勞擢丞列卿懋爾遠至可

開封府左軍判官劉機可光祿寺丞制

勅某京邑惟建左右獄以治萬衆之訟尸其官者蚤夜
訊問審辨能無滯繫斯亦勞矣以爾向繇銓調擇司其
職僅踰朞歲終無回枉即遷京寺尚仍舊治悉心矜慎
無或少怠可

單州團練使王興可龍神衛四廂都指揮使充
州防禦使制

勅王城之兵以內政寄令立廂部之師總車騎之軍我
求材武式允茲任具官某志懷內果有剛毅之風表質

外雄得驚強之選早登勇爵深練武經方薦委於邊隅
宜進參於宿衛尚資幹力留護外師且遥總於州防以
增重於戎壘勉服休命毋替欽祇可

陵州團練使楊餘懿可果州防禦使制

勅夫地親而信者勞易輯秩優而重者選殊艱非稔其
良疇懋予寵具官某材裕於幹性專以馘早近籍之參
華亦煩司之迭委而自出扞邊塵之侮入嚴城籥之機
勤勞歷年端慎一節宜峻兵防之序益榮禁省之趨夫

寵至而戒者德所安器勝於任者譽乃永其思忠蓋以履恩休可

陵州團練使武繼隆可果州防禦使制

勅予有親信之臣出扞疆陲入侍軒闥歲久而勞益宣者思有以懋進之況軍防之秩廩厚而寄優不曰異寵厚以爾具官某性畧多通財資畢給太原一道兵鋒之萃爾以勁武稔於戎馬之勤內侍二省宸居之邃爾以忠謹服於夙夜之勤朕肆申前詔俾陟峻資夫近禁密

者當戒非履之習饗寵名者宜念後圖之艱可

台州司士參軍顏似賢可婺州蘭溪縣尉制

勅某惟爾遠祖昔在唐室忠勁之節聞者義之爾遠守一局而能為民去暴況賢者之後不有旌勸者虐命尉於邑且優其廩爾其勉以自力可

故果州團練使劉永世可贈汝州防禦使制

勅某國家褒良臣則有飭終之典寵近戚則有憫存之禮以爾承高門之緒服諸使之聯材未克施命奄不淑

適念母慈之請重言肺附之親特綸省之下書俾兵防
之加遜歆茲典澤貴於幽途可

故光祿卿劉參男膺可太常寺太祝制

勅某朕念參器幹之茂寢履卿列奄爾捐館遺孤曷怙
特遷奉常之屬其勉承家之訓思荷休命以光前人可

內外待制制

勅朕歎太室以奉黃流之裸禮崇丘以升紫烟之燔鴻
儀訖成純貺丕格迺眷峻良之器夙參侍從之華亶有

職勤並均德施具官某等望美當世材經本朝或忠蹇
留於諫言或謏敏濟於事劇比嚴大旅之方擁羣娛之
休奉詞於中丕顯禮樂之助述職於外有虔牲玉之奢
進以勲散之資疇以邑國之賦往欽吾渥勿懈攸居可
江淮等路都大發運使許元可充天章閣待制

制

勅國家歲漕東南轉於江湖之表絕淮達泗而後至京
師亡慮六百萬之人蓋煩費矣非有材臣經之則烏克

濟哉具官某強白幹給雅有吏資向擢使於外而能夙
夜規畫十年之間粟衍而財物賦者不加其歛餽者不
苦其役非爾宿官之効歟雖比歲上計叙勞加寵朕惟
才之未稱也今計臣況又上漕最之羨朕實嘉爾顯績
是用進聯內閣換秩司刑仍寄以舊職之務惟爾思久
其業毋廢嚮勤尚或祇寧予訓可

屯田郎中詹庠可都官郎中制

勅某世治俗厚賢能衆多其高材異行則待以越次之

位而守職奉法亦褒以累日之賞非有厚薄理則然也
爾服於朝著陳力任事有司稽年書閔應陟其增一秩
以慰夙夜浚明之勤往服休命勿忘祇飭可

屯田郎中知黃州麻溫故可都官郎中制

勅某朕宅丕后承平日久治具明備中外之臣有能虔
朕命循奉條詔不曰良吏耶以爾詞學策名敏達從政
典決郡事歲課有聞命進中都之官尚留淮服之寄益
厲乃績以祇茂恩可

工部郎中直昭文館王達可刑部郎中制

勅某夫文昌之總衆務秋官之掌三典進列郎位莫匪
士望之擇考用歲閱茲為吏勤之勸以爾識裕而文邃
行端而氣直乘清詔之傳至必屏姦更劇郡之符去皆
留愛且懷材之衆譽何積効之久鬱就遷西火之次益
華東觀之業勉祇茂命尚服遠途可

翰林畫藝學守金城縣主簿侯文慶可翰林畫
待詔制

勅某以繪事之妙祇於禁林稽工賞勞寵或異等宜待
宸嚴之詔仍紆華組之榮益思恪恭以稱褒命可

問賢良方正策

皇帝若曰自昔欲治之主曷嘗不進圖材賢以共天下
之務哉終之名發事施以傳休於無窮朕甚慕之近代
設策士之科而失取人之實所問或非要而所言未必
有合至使遷忠憤之極論角靡曼之虛文情鬱事遼上
下相失曾何大道之補焉朕享國之日淺永惟任大而

守重欲聞讜直之言以鑒不逮而未始云獲子大夫褒
然應書其考於古而不迂質諸當今而易行為朕竭思
而茂明之夫天人之際災祥各緣類而至也故至治之
時必有休符發為星辰雨露草木鳥蟲之祥皇極之不
建乃六沴並下害於爾民君人者儻不思復天變則遂
至諄諄而不可扶持此皆前世已然之效也朕即位以
來非有歌鐘狗馬之娛與夫外家女寵爵位賞賜之過
也迺二月乙巳大風晝冥四月丁未白氣起西方七月

丁丑太白晝經天八月庚寅大雨霍京師半年之間鉅
異四發豈朕不共不忱不決不達之致與是以夙夜顧
省厥違之靡寧也矧今吏治之未醇民風之未厚官濫
而濫入之源未塞兵衆而選用之法未精工作浮巧於
都中豪右僭侈於公上田野雖加闢而農有寒饑之患
關市雖弛禁而商無賈貨之通豈不欲人蹈名節而廉
恥常不立豈不欲人遠刑罰而抵冒常不止將以六正
八疵察跡夫忠邪之端則悼不能以情見以七教三法

化陶乎善惡之類則患不能以家撫來遠臨人節禮曷
為異同之論生利事神保民豈無後先之指設飲於鄉
以歲行之使知有恭老悌長之節古獨以為宜乎歛穀
於社以時發之使知有揀貧卹荒之政今獨以為難乎
宋景一言而勝妖青朕下罪已之詔甚祇懼也而未有
轉禍之占漢宣終世以核名實朕發責吏之書甚丁寧
也而未有飭職之應昔仲舒之推災異專治春秋之學
劉蕡之對闕失深陳社稷之計遠監百王興壞之所繇

近慕四聖功業之所就何行而適世變何脩而當天心
子大夫其思銷異致祥揀弊起治之術熟之復之母懼
執事以稱朕詳延之意焉

欽定四庫全書

華陽集卷四十一

宋 王珪 撰

表

進所業表

臣某言臣聞三代之隆至周而文物具六國之季逮漢而儒雅興蓋御休明之期必講希闊之務故聖賢相與游精於太平而功業較然流光於亡極適及其會以要厥成夫士之所以修身而樂趨乎時君之所以急賢而

期濟諸用上下相望古今一途於昭我朝能事盡在遠

覽當世羣材並驅竊伏自思匪圖安待

臣某
中謝

恭惟皇帝

陛下中天紹命若古凝猶毆涵生於大猷撫萬宇於無
外爛然而睹王業淵然而流化源網羅天下倫魁之賢
經緯王家治體之具外則州蠻衆建以講勸乎藝文內
則辟海園流以充當於道德兼廣數路揖漢廷之休風
並張六科擎唐室之高誼精神相會體貌相臨至於秉
軸而處中授鉞而張外選非此路仕不為稱得人之隆

與古亡媿伏念臣稟生孤陋陶化醇醲剝先民之緒風
承一師之末學法度之御卒獲禽而少功支離之形視
攘臂而無用里閭湮沒歲月困勞偶監菑川之推旋籍
太常之奏趨奉大對幾脫容刀之慙擢置上游都念敝
帚之見一命補外半符留中歲漕舟車之衝日率文墨
之繁道路迎送之所交錯簿書期會之所放紛職幾以
墮學浸以落而自解去下吏被疾連延趨還大廷積日
淹久尚人言之未擴繫天造之曲容其敢自飾草茅之

愚以動朝廷之聽徒以沿世清緒遭時上文過隨衆賢
嘗搢盛際有伯魚之志止圖一見之榮無賈生之才敢
期半夜之召疎賤之覲忸怩不遑伏望皇帝陛下均燭
理之明懋孤學之進深惟下情之雍寢廣上聽之聞第
公車之篇或誤中於乙覽給上方之札特許從於試言
雖曲士之微誠無補用之迹而本朝之體足長右賢之
風則臣千載蒙榮萬死亡恨謹以所業十軸詣東上閤
門隨後投進以聞臣某無任

賀加上真宗皇帝徽號表

臣某等言今月二十五日自大慶殿發冊寶赴太廟加上真宗皇帝謚號禮畢者格清廟之靈方騰於丕稱先至日之吉蓋重於常儀慶流本朝孝錫萬類臣某等中賀伏思先皇帝右文下武而臨邦家茂烈休光而承祖考追跡三代垂鴻億年若受天元符稽古明訓兵革戢於二紀晏然有成功之隆封禪告於東巡穆然有饗德之意至神邈而如在衆美具而未褒斯固絜三靈之歡

系兆人之望豈容盛日未講茲文恭惟尊號皇帝陛下
繼治大明永懷罔極怵惕中夜丁寧有司博士傳經以
稽求於事典弼臣奉冊以對越於明威適嚴郊報之秋
庸廣孝思之慕所以追崇之禮厚配享之道隆萬福一
新洪圖更茂臣等率百辟之助敢竭於至誠有不世之
榮獲觀於盛際聲明所接抃蹈皆同臣某等無任

賀冊貴妃張氏表

臣某等言今月三日文德殿發冊貴妃禮畢者伏以國

風之始蓋推厚於人倫君德之明亦參祈於內助故命
妃之制上憲於紫籙告廷之華圖永於徽冊臣某等

賀伏惟尊號

皇帝陛下懷天地之祐格祖宗之靈以寧

紹於家邦以延鴻於基緒再惟廟享之奉乃眷掖英之
宜飭婦順之修協敷於風化無私謁之志永念於憂勤
諏今日之協龜詔有司之發號服禴翟之飾以冠內外
之儀詠螽斯之篇當協衆多之喻慶宜皇壺位亞坤闈
臣某等早會聖期偕榮朝叙覲上儀之畢舉聲多抃以

來同臣某等無任

賀明堂禮成表

臣某等言今月二十七日大享明堂禮畢者伏以惟王者
布政實嚴太室之居惟聖人享親莫隆上帝之配屬本
朝之盛際講三代之闕儀涵濡太龠鼓躍羣動臣某恭
惟皇帝陛下撫中天之運躬上聖之姿懷祖宗之靈霜
露以之怵惕事天地之重夙夜罔或怠遑謂欽柴之祈
數已見於郊廟而合宮之享獨未報於柔盛適涓季秋

咸秩羣祀故已來諸福之物交三靈之歡既親事於几筵遂還御於親闕渙發大號恩覃有生念人之孝則廣漏泉之封恤民之老則賜養年之具斯誠帝王之盛德邦家之鴻休臣某等生逢盛時晚綴嚴近聞舜韶之美既參百舞之儀登春臺之和更洽羣歡之至臣某無任謝賜入伏早下表三道

臣某言伏蒙聖慈差入內侍省高班某傳宣三司入伏早下至末伏依舊者伏以炎煒貫叙適當祠伏之初詔

驛傳音俾遂退公之佚被寵至渥拊躬若驚臣某

中謝

伏念臣器稟孱微慶逢休盛侍帝殿之邃乏嘉猷之屢
陳綜計廷之繁殆經費之鮮給然而金穀萬計夙宵一
心方懷謫之寢深敢圖安而自便豈謂尊號皇帝陛下
愛均臣體慈發天衷載矜歎鬱之辰甫降深純之誨舉
漢家之令特優出沐之期詠周人之詩敢數在公之節
永肩勤瘁上答生成臣某無任

伏以上伏之辰載離於煩暑中發之詔有惻於庶司曰

遂公休舉御聖寵臣某

中謝

伏念臣早緣愔學獲齒清

時居乏先容之階獨誤上知之厚晚輸忠瘁徧歷顯榮

剋京兆之煩固政迹之亡異綜大農之計幾心畫之曾

殫然而職隆則謗所叢材鮮則事不給寒暑同薄敢思

退食之安夙夜勤勞大懼曠官之謫豈謂

尊號

皇帝陛

下德深天地愛浹臣鄰軫災籥之御時降使貂而申命

蠲曹事之冗俾從少間之私竭公家之為終盡一心之

報臣某無任

伏以夏簫之交甫會三庚之熾詔聲之發有矜庶府之
煩退樂公休仰御天寵臣某中謝伏念臣緣末學之進
乏先容之階早塵賢路之游遽竊禁林之侍奉藩宣于
外蔑治迹之布聞筦財利於中幾心計之殫盡然謗叢
材薄責起任憂殆歲月之末功曾夙宵之敢肆伏蒙皇
帝陛下至人裕物元化參天念時之暘則及人之恩閔
職之勞則均人以逸舉漢廷之式率遂早歸之期因唐制
之頒更宏多暇之政臣某敢不靜而經事居則圖庸一

心在公之為少醕自天之賜臣某無任

掩皇堂慰皇帝表

臣某言今月十日太皇太后山陵掩皇堂禮畢者池荒
振節龜筮協謀掩金駕於重泉留玉衣於閒館三辰晦
象率土摧心恭以太皇太后母儀三朝有家邦之一德
力援二帝有社稷之大勲自經屬引之辰肆舉就房之
典耕不倚耒無踐襍田墮之傷馬皆服車無犇蹠溪山
之恐嘉符衆見熙事丕成茲蓋皇帝陛下孝奏高穹精

通幽壤鴈飛銀海雖閱景於千年龍繞青山終遺祥於
百世臣等伏恨奉使在道不獲隨班犇詣西上閣門謹
奉表稱慰以聞臣無任

掩皇堂慰太后表

臣某等言今月十日太皇太后山陵掩皇堂禮畢者筮
宅之祥既積封於甫窳安臣之享援精事於初虞愴極
慈宸涕零行路臣等中慰恭以太皇太后援昇先帝定
保今朝德盛而無所名恩閔而不可報何奄鍾於邦釁

遽絕睇於天儀前諏先遠之期丕舉方中之事大升安步曾路塵之莫驚羨道長局俄陵土之已復伏惟皇太后殿下欲養之心不逮思媚之志猶勤羽駕真游已會在天之聖龍盤厚壤終承卜世之祥臣等伏恨奉使在道不獲隨班詣內東門謹奉表稱慰以聞臣某無任

賀壽星見表

臣某等言伏覩司天監狀今日壽星出見者伏以金行貫叙灝氣肅於西成珠緯躔空祥輝麗乎南極瞻同

幽溥慶屬熙明臣某等

中賀

恭惟

尊號

皇帝陛下紹寶

歷之休握元樞之妙以仁惠育物而靡生不遂以誠德
參天而靡感不通蓋象已召於太平而物屢叢於嘉瑞
爰察璣中之度載觀弧北之祥霄景澄夷乾文燦潤薦
人君之壽既稽元命之圖表天下之安又載西京之志
宜新史牒以煥休符臣某冒當軸之司乏調元之助徒
懷盛際之遇永祝壽齡之昌伏乞宣付史館臣無任

賀老人星見表

臣某等言伏覩司天監狀今日老人星出見者伏以
青煒御氣未臨春籥之分景緯騰精已直天弧之北德
符象告瑞疊民瞻恭惟尊號皇帝陛下治穆九皇武繩
三后勤萬幾而載惕履衆美而勿休故化纔被而邦孚
事適修而天答方察紫躔之度遽觀南極之祥靈氣發
於先朝駢芒熒於既暮茲所以贊民風之奏延皇歷之
遐雖嵩極萬壽之呼河圖五老之告竊方盛際未煥珍
符臣某等饗近清光參調元化識高穹之薦祉祈景祚

之垂鴻伏乞宣付史館臣無任